

Xajon ra ma-ni jò ra tsikínda jè Pablo ra isìkasén-la xita naxindá-la Cristo ra títsajna ya Tesalónica

Kó'sín nga síhixo'ta Pablo jñà xita naxindá Tesalónica

1 ¹ Jiòn xita naxindá-la Nainá ra titsajna ya Tesalónica, jiòn ra chja'nda-no Nainá ra Na'ín-ná kò jè Jesucristo ra tíjna ítjòn-ná, 'koaá 'sín nìhixo'ta-lajin 'an Pablo, Silvano kò Timoteo. ² Nainá ra Na'ín-ná ma kò jè Jesucristo ra tíjna ítjòn-ná katatsjá-no kjonda kò kjo'nchán ya ajin inìma-no.

Kjoanda ra 'bí-lá Nainá kò ra níjé-isa-lá

³ Machjeén-ní nga nichjin nchijòn ko'kín-lajin Nainá ra a'ta tsajiòn-jiòn ndí 'ndsé kò tichjeé nga tse kjonda kata'se-la ra jè, nga 'koaá 'sín tjínè-la nga 'sian-jin, ta ngatjì-la nga nichjin nchijón-ní isa nda inchimakjiín-isa-najiòn ra a'ta 'tse Cristo, kò tímatseé-isa kjotsjacha ra tjín-no kò xàngioo nga jngó jngó-no. ⁴ 'Koaá ma-ni nga 'ñó matsja-najin ra a'ta tsajiòn-jiòn, kò 'bènajmí-lajin naxindá-la Nainá ra kj'íi i'nde títsajna nga 'ñó nda makjiín-najiòn kò 'ñó nda chíkjoajin-najiòn 'kia nga ta mé kjoa ra kajion koni 'kia nga mahatjingi-no xita kò nga kajion kjohi'in. ⁵ Ta nga'tsì kjoa kii, yaá 'ya-la nga jè Nainá ndaá ma-la bíndajín, kò 'koaá 'sín tsò-no nga bakén-la nga ya kitsajnajin-la jñà xita ra jè tíbatéxoma-la, kò 'koaá 'sín ma-ni nga kjohi'in inchinikjioón.

⁶ Nainá, kjoa kixíí ra 'sín nga tsjáhi'in ngajo-ila jñà xita ra tsjá-no kjohi'in. ⁷ Kò jiòn ra inchinikjioón kjohi'in, sùkítsahijyo 'nchán-no kò tí'koaá sùkítsahijyo 'nchán-te-najin 'kia nga jè Jesús ra tíjna ítjòn-ná, tjen-jin ní'f-jnga nga

kjinchrabàjen-ni ján ngajmi, kò kjihijtakò jñà ìkjali-là ra tse nga'nó tjin-là. ⁸Kíí xá kj'íí-ni mé-ni nga tsjá-là kjohi'in jñà xítà ra mì kì bexkón Nainá, kò tí'koaá mì kì ma-là síhitjasòn koni 'sín tsò 'én xítse 'tse Jesucristo ra títina ítjòn-ná. ⁹Jñà xítà kù, kj'ítá nichjin sìikjín kjohi'in ra 'kì-là skanda ta kjíá-nioo, kò kjíín kítsajna nándà nga jè Nà'ín-ná títina kò níkjíá ske jè kjoajeya-là ra tse nga'nó tjin-là. ¹⁰'Koaá 'sín koma jè nichjin nga kj'íí india-ni jè Nà'ín-ná, nga jchaxkón-là kò nga jeya kíjna a'ta 'tse nga'tsì xítà-là ra makjín-là; yaá kojngokò-te jìòn ta ngatjì-là nga kjokjín-no jñà 'én ra tsì'kènjámí-lajin.

¹¹'Koaá ma-ni nga kj'ítá nichjin bitsa'batjì-lajin, mé-ni nga jè Nainá kò'sín katatsò nga bakèn kitií-najìòn koni 'sín nga xá kiichja-no. 'Koaá 'sín síjé-là nga ngi koó nga'nó-là nga katabasikò-no mé-ni nga nda kitjasòn-no nga'tsì kjonda kò nga'tsì xá ra mejèn-no nga 'siaan, koni 'sín nga síchiya-no jè kjoa ra makjín-no, ¹²mé-ni nga a'ta tsajìòn jeya kíjna-ni jè Jesucristo ra títina ítjòn-ná, kò tí'koaá jìòn jeya kítsajna ra a'ta 'tse, koni 'sín nga tjin kjonda-là jè ra Nainá-ná ma kò jè Jesucristo ra títina ítjòn-ná.

'Kia nga jcha-là kó'sín nga 'nó 'cho 'sìin xítà ra ngi jé báhijtakò

2 ¹Jè xajon ra kindá-no 'ndì 'ndì-nì jè-ní 'kia nga kj'íí Jesucristo ra títina ítjòn-ná kò 'kia nga kíixkóya-ná nga ya kítsajna ké. 'Koaá 'sín síjé-no, 'ndsé kò tichjeé, ²kì tà chjàn taxkì nikaatjya-la kjobítsjen-no, kò kì tà chjàn skon-la, tsa yá ra kò'sín kítso-no nga 'koaá 'sín ijye kinakjoáya-jin, kò nga jngoó 'én ki'tsì-jin kò nga jngoó xajon inikasén-jin nándà nga tsò nga ijyeé 'ji india-ni Nà'ín-ná. ³Kì bi'nde yá ra taxkì skoóndacha-no; nga skanda 'kiaá kj'íí jè Nà'ín-ná 'kia nga kijchò nichjin nga 'nó kondra kítsajna-là Nainá xítà; kò kòtsijen jngo xítà ra 'nó 'cho 'sín ra xá kò'sín ijye tjinè-là nga sìikjín kjohi'in skanda ta kjíá-nioo. ⁴Kò jè xítà rakì, 'nó kondra kíjna-là nga'tsì ra Nainá tsò-là xítà kò ta mé-isa-nioo ra jñà xítà bexkón; kò 'koaá 'sín kítso nga jè títina ítjòn. Kò skanda kijchò katéxoma-nì ya ingo ítjòn-là Nainá nga kò'sín kítso nga jè sabá Nainá.

⁵¿A mí bítsjen-no nga 'koaá 'sín kíxian-no 'kia nga ya tsakátijnako-no? ⁶Ijyeé 'ya-nájiòn 'ndì-nì mé ra tíbatéchjà-là

jè xita 'cho rakì; nga ki, 'kia kjón tjinè-la nga kj'íí, 'kia nga kijchò chiba-la. ⁷Nga jè nga'nó-la kjoa'cho, ijyee tísixá'ma, tanga tjin jngo ra tibatéchjà-la, kò ta jè chija nga tjáhixìn, ⁸kò 'kiaá kotsíjen jè xita 'cho rakì; akjòn jè Jesús ra títina ítjòn, ta ma ta jé jtà ra kitjo-ni tsa'ba tsjá-la kjohi'in skanda ta kjiá-nioo; kò jè nga'nó ra tjen-kò kjoajeya-la Jesús 'kia nga kj'íí india-ni, kjoahíxìn tsje-la nga'nó ra tjin-la xita 'cho ra kií. ⁹Jè xita 'cho rakì, 'kia nga kj'íí, jé nga'nó-la xita-níí tjen-kò. Kjin skoya kjojkón kokòn ra mì tsa kixi kjoa. ¹⁰Kò kjin ndiyá-la kjoa'cho sìichjeén nga skoóndacha-la jñà ra ijye kò'sín tjinè-la nga kjohi'in kòkò-la. Ta ngatjì-la nga mì kì tsjake ra kjoakixi ra ma kochrjekàjin kjohi'in ra kjoa 'tse jé-la. ¹¹Koaá ma-ni nga jè Nainá sìikasén jngo-la nga'nó ra kiíndisokò mé-ni nga katamakjiín-la jè ra kjoandiso, ¹²kò nga ya katakanè jé-la nga'tsi jñà ra mì kì makjiín-la ra kjoakixi, nga ta isaá jnchro kjoa'cho sísin-la.

Jñà ra xá itjahájin-ni nga kitjokajin kjohi'in

¹³Jìòn 'ndsé kò tichjeé ra 'nó tsjake-no Na'ín-ná, nichjin nchijón-ní nga tjinè-najin nga kò'sín 'kín-lajin Nainá ra a'ta tsajiòn nga tse kjonda kata'se-la ra jè, ta ngatjì-la nga jè, xá 'koaá 'sín ijye tsjahíjin-no skanda ti'sa tjà'tsin-la kjoa. Kíí xá tsjahíjin-no nga ma kítjokajin kjohi'in 'tse jé-no. Kò 'kia nga jè Inima Tsje-la Nainá tísitsje-no, kò 'kia nga nda makjiín-no ra kjoakixi, 'koaá 'sín ma-ni nga ma kítjokajin kjohi'in. ¹⁴Kíí xá-la a'ta 'tse 'én nda-la Cristo ra jin tsi'kènajmíya-lajin nga kò'sín kiichja-najiòn Nainá, mé-ni nga ti'koaá kijchòtjingi-la kjoajeya-la Jesucristo ra títina ítjòn-ná.

¹⁵'Koaá ma-ni ndí 'ndsé kò tichjeé, kò'sín kixi títsajna jìòn koni 'sín nga makjiín-no, kò kì jmitákon jìòn koni 'sín tjin kjoakixi-la Cristo ra tsakon-ya-lajin, a jñá-ní 'én ra jin kotsi'kìn sabà-lajin, o ra jñá-ní ra jí'ta xajon ra inikasén-lajin. ¹⁶Jè sabà Jesucristo ra títina ítjòn-ná kò jè Nainá ra Na'in 'mí-lá, ra 'nó kjotsjake-ná kò ra síjetakón-ná skanda ta mé nichjin-ni, kò ra tsjá-ná jngo kjoanda ra chiá-lá ra ta kjotjò 'tse, ¹⁷jè katatsjá nga'nó-la inima-no kò katasíkiyiyanda-no nga ma 'siaan nga'tsi kjoa ra nda tjin kò kinákjoaa nga'tsi 'én ra nda tsò.

Jè 'én-là Nainá jeya katijna

3 ¹Ra fehe'ta-ni, jìòn ndí 'ndsé kò ndí tichjeé, tìtsa'batjì-nájìn mé-ni nga jè 'én-là Nainá ndìton katamabísòn-ni, tì'koaá nda kata'yaxkón koni 'sín kjomà ya a'ta tsajìòn. ²Tì'koaá tìtsa'batjì-nájìn mé-ni nga jè Nà'ín-ná katabasìkò-najìn nga mì jǎà xitǎ 'cho ra mì kì nda tǐjín kjobítsjen-là sketon-najìn; nga mì tsa ta nga'tsì xitǎ makjǐín-là. ³Tanga jè Nà'ín-ná síhitjasòn ki'tá-ní koni 'sín nga tsò ra jè, kò jé tsjá nga'ńó-najìòn nga kixì kìncha kò nga sǐkìnda-no ra a'ta 'tse xitǎ-ní. ⁴Koaá 'sín 'ńó tǐjín takòn-jìn ra a'ta 'tse Nà'ín-ná, nga 'koaá 'sín ijye inchi'nià jìòn kò 'koaá 'sín 'siaan-isa jìòn koni 'sín inchi'nià-lajìn. ⁵Jè Nà'ín-ná katasìkò-no nga kò'sín kata'se-no kjotsjacha koni 'sín tǐjín-là kjotsjacha Nainá; kò nga kò'sín katachìkjoako-no kjohi'in koni 'sín ichìkjoako-là Cristo.

Machjeén-ní nga sixé

⁶Jìòn ndí 'ndsé kò ndí tichjeé, 'koaá 'sín bi'tin-lajìn a'ta 'tse Jesucristo ra tǐjna ítjòn-ná, nga kì ya níngàsòn-koo jǎà xitǎ 'ndsé kò tichjeé ra majìn-là sixá; jǎà ra mì tsa kò'sín inchi'sín koni 'sín tǐjín kjoakixì ra jìn tsakon-ya-lajìn. ⁷Jìòn, ijyeé nda tǐjìn-no kò'sín nga machjeén nga chǐngí-nájìn, nga mì tsa ta jyò tsikitsajna-jìn 'kia nga ya tsikitsajnakò-lajìn. ⁸Mì tsa ta tsichi kjotjò-jìn ra a'ta tsajìòn. 'Nó iníxá-jìn nga kò nichjìn kò nitjen inìkijtà-jìn ijo-najìn, mé-ni nga mì jìòn kjohi'in-no.



Jè xá ra ki'sin Pablo nga tsikínda ni'ya nikje

⁹Mì tsa tsò-ni kjoa nga mì kì tjí'nde-najin nga sijé-lajin tsajmì ra machjeén-najin; kíí kò'sín ki'nià-najin nga jngo xkòsòn tsikijna-lajin, mé-ni nga kò'sín 'siaan-te ra jìòn. ¹⁰'Kia nga ya tsikitsajnakò-lajin, skanda 'koaá 'sín tsiki'tin-lajin nga jè ra majìn-la síxá, tí'koaá mì kì tjí'nde-la nga kokjen. ¹¹Nga 'koaá 'sín na'yá-jin ra a'ta tsajìòn, nga tjítsajnajin i'ka-najìòn ra mì tsa kixi tjíma; jè ra mì mé xá 'sín, nga ta yaá fajin fa'a ya ñánda nga mì tsa ya bako-la. ¹²Jñà xitá ra kò'sín inchi'sín, 'koaá 'sín bi'tin-jin kò 'bì-lajin 'én ra a'ta 'tse Jesucristo ra tíjna ítjòn-ná, nga 'ñó katasíxá nga katabínè-la xá ijo-la mé-ni nga kò'sín koaàtsji'a-ni ijo-la.

¹³Kò ra jìòn-jìòn 'ndsé kò tichjeé, kì mì'on-no nga nihitjasòn kjoa ra nda tjióon. ¹⁴Tsa tjín i'ka ra mì kì 'nchréhijon koni 'sín tsò xajon ra inchinikasén-lajin, ti'ta xkòn yá-ní, kò kì tà chjàn ya níngàsòn-koo mé-ni nga katasabà-la. ¹⁵Tanga kì tà chjàn kondra mangí-la, ta isaá jnchro tiyachiya-la koni 'sín nga 'ndsé 'mì-la.

'Én ra síkjehe'ta-ni jè Pablo

¹⁶Kò jè sabá Na'ín-ná ra tsjá kjo'nchán, jè katatsjá ki'ta-no kjo'nchán ra ta mé kjoa-isa-ni. Jè Na'ín-ná nda katijnako-no nga'tsi-no.

¹⁷'An ra 'mì-na Pablo, ngi jè sabá ndsa tíbindá-na ñánda nga fehe'ta-ni xajon rakii nga tísixó'tà-no. 'Koaá 'sín 'ya-la xajon ra 'an sikáséén, 'koaá 'sín kjàn letra ra 'an bindáa. ¹⁸Kò'sín katatsjá-no kjonda-la Jesucristo ra tíjna ítjòn-ná.